



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 6

Yangia anidakangma :



Tir Yimiyim



tiryimiyim@aolima



tir yimiyim

TAPAK 8

Rajnath Singh-i Arunachal nung Nechipu Tunnel lapoktsü

Luis Rubiales Spain nung okadak kati jaokogo



VOL. XX NO. 332 (ADOK 332) DIMAPUR RASEMNÜ (WEDNESDAY) RONGJUI (SEPTEMBER) 13, 2023 ₹ 5.00

14 buba NLA nung bill 3 agizük Nagaland Assembly-i UCC anema lemtet ka agiogo

Kohima, September 12, 2023 (TYO): Nagaland Assembly-i Mongulbarnü voice vote ajanga Bill asem agizükogoo.

Tanü agizükba Bill asemji- The Nagaland Motor Vehicles Taxation (Amendment) Bill, 2023", The Nagaland Passengers & Goods Taxation (Amendment) Bill aser The North East Christian University (Second Amendment) Bill, 2023 lir.

Hombarnü Minister P. Paiwang Konyak-i mezüngbuba bill ana benok aser tasembubaji Minister Temjen Imna Along-i benoka liasü.

Chief Minister Neiphiu Rio-i Transport department bona lir aser pai "Principal Act ta ajaba Nagaland Motor Vehicles Taxation Act, 1967 ajanga Motor Vehicles nung tax agitsü melar" ta ashi.

Transport vehicles atema Motor vehicles tax ya 1999 küm tesüsabuba repringshia liasü aser personalised/private vehicles atema 2009 küm repringshi, ta CM Rio-isa ashi.

"Linük nung tanga state tem den medemdangra Nagaland nung tax kanga ajema agir saka transport vehicles hire asüba taa kanga tuogo aser kümtem süia arudang gari lenmangtem tajungba kümogoo" ta paisa metetdaksü.

"Mapangtem süia arudang kechisarena jenjang ajungketogoo aser state senotsü

lenmang tajungba akümtsü atema sorkari Act of 1967 yanglushia Motor Vehicles Tax meypa repringshinür" ya Rio-isa ashi.

Nagaland Motor Vehicles Taxation Act, 1967 nung state sorkar ajanga motor vehicles tax agitsü tashi agüja lir ta paisa shisem.

Passengers and Goods Taxation (Amendment) Bill, 2023 nung gari lenmang ajanga motor vehicles nung passengers aser goods abenba atema tax agitsü lateta lir aser iba ya 2000 nung tatemsaba repringshia liasü, ta CM Rio-i ashi.

Anungji state sorkari Act of 1967 yanglushia passengers and goods tax meypa repringshinür ta paisa metetdaksü.

North East Christian University (Second Amendment) Bill 2023 ya Clause-1 "Faculty of paramedical studies" nungja melenshitsu atema lir, ta Minister Temjen Imna Along-ia ashi.

Iba ya "Faculty of paramedical studies, faculty of nursing, faculty of medical sciences and research" agi melentsü ta paisa ashi.

Faculty of paramedical studies kübok faculty of nursing, faculty of medical sciences and research maden. Indian Nursing Council Act, 1947 ajanga nursing ya independent faculty ka asütsü lateta lir ta Minister Along-isa metetdaksü.

Sema-i ashi.

"Linük ka tamendakdakji tanurtem lir anungji kaketshirtem jenjang tajungtiba angutsüsa tesayurtemi parnok sayutetsüla" ta Hotolu-isa ayongzükoo.

Iba sentong nung EBRC Mangkolemba II Coordinator S. Temsu Lkr-i tesenteper pelaa agizük aser District Education Officer Mokochung Sentinenla o All Ward Chairmen Mangkolemba Chairman Lanuyanger nati o tatsütsü jembia liasü.

Kohima, September 12, 2023 (TYO): Nagaland Assembly-i Mongulbarnü Uniform Civil Code (UCC) kübok Nagaland medendaksütsü atema lemtet ka agiogo.

Monsoon session anogo tanabuba nung Chief Minister Neiphiu Rio-i sorkar bangzüng benoka liasü. Idangji pai "India sorkari February 21, 2020 nü 22nd Law Commission of India shimtet aser parnok kümstük August 31, 2024 tashi atsülangtsüogoo" ta ashi.

Law Commission-i June 14, 2023 nü India ajungalen UCC benoktsü asoshi tebilemba aser shisatsü meshia public notice ka agütsü. Ajisüaka Nagaland sorkari Cabinet lemtet ka ajanga July 4 nü UCC magizükba indang tebilemba Commission dang ashi.

"Independent British putu matongdang Nagaland indang putiotsü, nüjiso mangudang

nungi 'non-interference policy' nangzükba, India sorkari Social & Religious Practices and Customary Laws maneni benshidaksüba aser Arrla 371A kübok temetentem agüja aliba nung ajemdaker UCC kübok Nagaland medendaksütsü ayongzük" ta CM Rio-i ashi.

State sorkari September 1 nü UCC dak sendaktepa alirtem külem senden ka ayonga amendang kin telok aser civil societies balalai UCC magizükba metetdakra liasü ta paisa ashi.

"UCC indang nükjidongji nija inyakyim atema ozüng ka dang latettsüba lir. UCC ajanga sobaliba ozüngtem, inyaksangshi aser tamangba yimsü asoshi lendong bentsür arutsü ta Nagaland sorkar aser Naga nungeri bilemer" ta CM Rio-isa ashi.

"Constitution of India nung Arrla 371(A) ajanga Naga nunger tamangba yimsü mesüra

inyaksangshi, Naga sobaliba ozüng aser inyakyim, Nagaland state indang ali aser rongsen dak sendakba asoshi Parliament nung yangluba Act kecha Nagaland Legislative Assembly-i lemtet ka magira Nagaland state nung benoktsü makok ta shia lir" ta paisa metetdaksü.

Anungji 14 buba Nagaland Legislative Assembly ajanga UCC ya Nagaland state nung mebenoktsü atema bangzüng ka agi junger ta Rio-i ashi.

Hombarnü Nagaland MLA temi UCC onük benoka jembitepa liasü aser Nagaland Assembly Speaker Shringain Longkumer-i Mongulbarnü iba atema bangzüng ka bener arutsü temelaba agütsü.

Iba nung ajemdaker Speaker Shringain Longkumer-i vote agiteptsü atema bangzüng benok aser temelenshi kecha melii voice vote ajanga nisung ajaki mulunga agizük.

MLA Nuklutoshi-i Tuli railway station belendaksünür

Kohima, September 12, 2023 (TYO): National Peoples' Party (NPP) Legislature Party leader aser Arkakong A/C MLA Nuklutoshi-i Tuli Town-i Tuli Railway Station belentsü ayongzükogoo.

Nuklutoshi-i state sorkar dang iba onük Centre dangi abentsü ayongzük.

Assembly nung Question Hour mapang Nuklutoshi-i ashiba agi tang Tuli nung aliba goods train station ya arem min tiyongtsü 10th Mile nung lir aser iba temeket nung nisung talir mali.

"Passenger shingaa mini mounütsü anungji Tuli Town tashi train lenmang yangluba aser railway station ka lapokba ajanga Central aser Eastern Naga nungeri teyari tulu angutsü" ta pai ashi.

"Iba ya kanga dang tongtipang tesem ka asütsü anungji jila ka tonga ora passengers teimba akümba dang masü saka passengers atema senotsü tarulen alitsü aser iba temeket nung alir rongsenketzüng maparen teimba akümtsü" ta Nuklutoshi-isa ashi.

"Nagaland nung alirtem

rongsenketzüng khurettem asadanga anüolen tsütsü alirtem train station aser airport aliba ajanga Eastern aser Central Nagaland nung alirtem den khuret tajemba ajurur" ta paisa metetdaksü.

"Nagaland state ajungalen rongsenketzüng terenlok kasa agütsütsü atema Assam den arütsü aliba entry points ajak nung train stations alitsü nungdaker. Iba ajanga state sorkaria senotsü angutsü lenmang lapoktsü" ta Nuklutoshi-isa ashi.

Paisa Nagaland Chief Minister dang tekaratiba nung Railway Ministry den iba onük lemsateptsü atema nangzüktsü mepishi.

Assembly nung departmental tasüngdangbatem langzüksütsü atema Health & Family Welfare Minister P. Paiwang Konyak nem mapa lemsükja lir aser pai Nuklutoshi dang railway connection indang tebilemba lemsatepba atema pelaba metetdaksü.

State sorkari Nagaland nung air, inland waterways aser railways ajanga connectivity tajungtiba agütsünür, ta Paiwang-i ashi.

"State sorkari Tuli tashi passenger train service tenzükshitsü shidangogoo saka Ministry of Railways-i ibaji magizük. Senotsü shitak manguba agi goods train service-i melen" ta paisa ashi.

"Ajisüaka department aser state sorkari Railway ministry den Tuli tashi passenger train service tenzükshitsü atema jembitsü nangzükker" ta Minister Paiwang-isa metetdaksü.

"State sorkari Tuli-Amguri Railway station ya goods atema dang yanglu. Iba Railway Board-i rongsenketzüng tsütsü tajangzük alitsü ajiteta state sorkar aser North East Frontier Railway (NEFR) ajanga extension asütsü shidang saka Railway Board-i 2018 nungi iba mapaji anen" ta Chief Minister Neiphiu Rio-ia ashi.

Train nung passengers aika senzüra Railways atema tajangzük asütsü anungji nisungtemi train nung senzüksü ayongzükker. Iba atema state sorkari junger ta asüba tesemtem nung railway stations lapoktsü merangtsü, ta CM Rio-isa ashi.

Mangkolemba nung Residential Hostel ka lapok

Dimapur, September 12, 2023 (DIPR): Mangkolemba SDO (C) Hotolu Sema-i Hombarnü Netaji Subash Chandra Bose Avishya Vidyalaya (Residential Hostel) lapoktsüogoo.

Iba Residential Hostel ya Luyong Ward, Mangkolemba nung yanglua lir.

"Bangdak department-i Mangkolemba nung Residential Hostel yangluba atema tenüngsang agütsür. Iba hostel ajanga makamaitba kaketshirtemi teyari tulu angutsü" ta Hotolu

Sema-i ashi.

"Linük ka tamendakdakji tanurtem lir anungji kaketshirtem jenjang tajungtiba angutsüsa tesayurtemi parnok sayutetsüla" ta Hotolu-isa ayongzükoo.

Select Committee nem Nagaland Municipal Bill 2023 agütsüogoo; Tetsür MLA temi shilem agi

Kohima, September 12, 2023 (TYO): Nagaland Assembly-i Mongulbarnü Select Committee nem Nagaland Municipal Bill 2023 repringshimtsü aser sendaktepa alir ajak den lemsateptsü atema agütsüogoo.

Tanü assembly nung Urban Local Bodies Election (ULBs) indang olemtepba sülen Select Committee nem iba Bill agütsü.

Parliamentary Affairs Minister K G Kenye-i "Urban Local Bodies Elections" onük benok aser ibaji Printing & Stationeries and Jails Advisor Kropol Vitsu aser Independent MLA Dr Neisatuo Mero nati pusema nungit.

"Nagaland Municipal Act

yanglur küm 21 süiaka iba tebilemstü mekotteti aruogo saka tang aliba sorkari nüboritem ola angatsü aser tetsürtem nem shilem lemsüktsütsü asoshi haihaura kateptsü atema inyakogoo. Sorkarisa 2001 Act ajanga meypa agienogoo aser ali aser kiojen rongsen nung tax magitsü lemtetogoo" ta Minister Kenye-i ashi.

"September 1, 2023 nü civil societies aser kin telok ajak den senden amendang mulungtep saka kari lemtet agiba nungi asetshioogoo. Ajisüaka telok teimbai lemtetba agitsüla sorkari Act tasenben bener arutsü" ta pai ashi.

"Sorkari Act meypa agiba agienba nungi masetshi aser Supreme Court-ia Arrla 371A agizükogoo aser Naga nunger sobaliba ozüng nung mekongshitsü ta shiogo" ta Kenye-isa metetdaksü.

Küm 21 sülen Neiphiu Rio lenisüba kübok assembly nung bill ka benokogoo aser department-i akokba tashi enoksemogoo, ta paisa ashi.

Tanü assembly session nung olemtepba mapang Nagaland nung mezüngbuba tetsür MLA anatia shilem agia liasü.

Minister Salhoutuonuo Kruse aser Advisor Hekani Jakhalu nati Naga nunger teburtem dang

tetsür nem shilem lemsüktsütsü mulunga agizükba atema pelaba metetdaksü.

"Central lennirtemi tetsürtem asoshi reservation policy yangluba aser Naga Mothers Association den Sumi tsür kati Nagaland nung women reservation mapa inyaksüla ta shia okadaki aoba atema pelar" ta Minister Kruse-i ashi.

"State Assembly nung tetsürtemi shilem agiba ya otsütsütsü inyakyim ka lir kechiyong 2023 election nung tebur kati kanga temulung ulua tetsür ana nem ticket agütsü" ta Advisor Jakhalu-ia ashi.

"Nagatsür ajak tenüng nung

onok nem maongka agütsüba dang masü saka takok angutsüsa mapa inyaksüba atema Chief Minister dang kanga pelar" ta laisa ashi.

"3-Dimapur A/C aser 8-Western Angami AC nung aliba teburtem ajanga otsü tasen ka yanglutet. Teburtemi vote enoktsüba dang masü saka tetsürtemi parnok constituency atema noktaktetsü ta tamang katet" ta Hekani Jakhalu-isa ashi.

"Nagaland nung civil society organizations, kin lennirtem aser Rio lenisüba kübok state sorkar angatettepa Assembly nung Municipal Bill tasen benokba atema pelar" ta laisa ashi.

Nagaland nung MLA ajak takdang ka nung dang lir: NPCC tir



NPCC tir S Supongmeren Jamir den par külem medemer lenla balala nung tenzükertem September 12, 2023 nü Mokokchung nung osangbener den jembiba sülen tangokba noksa nung angur.

Mokokchung, Rongjui/Sept. 11 (TYO):

Tang Nagaland nung elected member ajak takdang ka nung dang lir, ibaji janratemtsü kabo masü, parnok meita reprangertem shinga mali, anungji, parnok shibai aitsütsü? Ibai election inyakyim tai asü, political lenirtem tai asü mesüra voters-tem tai? Tanü chichiba aser khuret abenba aser nübur meimba lenir alimai akanger, ta September 11, 2023 nü Nagaland Pradesh Congress Committee tir, S. Supongmeren Jamir-i Mokokchung nung osangbener senden ka nung jembidang metetdaksü.

NPCC tir-i anir par külem party lenla balala nung tenzükertem tanü Mokokchung District Congress Committee aser ACCC nung ketdangpurtem den sensaksem ka party office nung menogo.

Tanü nungi tenzükä parnok Mokokchung district seymonga jajatsü par sentong lir.

Nüburtem, talisa grass root nung alir timtemba, tebilembatem aser parnok taginüba angadanyonga Nagaland tesem balala semdanga jajar, mezüngren nung district kar semogo, tang Mokokchung asemer aser September 21 nü Mon aser iba sülen Dimapur aser Kohima district-tem semdangtsü sentong renema lir, ta NPCC tir, Supongmeren-i osangbener senden ka Mokokchung DCC office nung akadang metetdaksü.

Tanü nüburtemi temelenshi aginür, aser asenoki clean election atema sashia jembir, saka tanü asen lima election agiba yimya nung yabo nübur asoshi teimla kangabo mali.

Election nung sen intokbaji sashira, menden 60 nung AC shia candidate tajemba agi 3-4 bo alir, candidate-temi sen intokbaji ongko inyaktangra küm nung state budget intokba dang nungi teimba lir, ta pai tesasaba olen ka lemsatop.

Tanü Nagaland sorkarji opposition mali sür aor, elected 60 prongla takdang ka nung dang alir asünung, parnok voters-tem atema kangabo süoki ia mebilemer. "Joko house nung asenok asoshi ola adoker shinga mali, anungji, yangji lendong keter", ta pai ashi. "Opposition maliba sorkar süaka elected member-temji nüburtemi shimtet asünung parnokia khuret metettsüla, tang amai dang ora nübur tali majungtsü", ta paisa shisem.

Nagaland sorkar iba ama tia ka nung shibai opposition mapaji inyaktü? NPCC-ia tanü tashi nüburtem atema noktaka arudar, Nagaland temelenshi tera danga bener arunüra Civil society organizations (CSOs), Non-Governmental Organization (NGOs) aser arogo-ia shilem agitsüla. "Ruling Govt.-i ashiba angatsü atema masü aser shinga tsütsülena tejak meshitsü ochi nung ola adoktsüla, aji mesüra asen lima temelenshi marutsü", ta paisa inyaktaksünüba o ka ashi.

Elected member 60 prongla takdang ka nung amentsüsa atongtetba ya shiba tai? Ibai inyakyim nung tai ali asü, political lenirtem tai asü mesüra voter-tem aitsütsü? Tanü asen lima temelenshi bener arutsü asoshi chichiba khuret abener aser nübur meimba lenir alimai akanger, ta paisa ashi.

Congress party ya joko opposition ka ama küm 20 dak

tali arur, iba mapang tajung majung aika ajangshia arudaki, anungji, "joko congress party-ia teraksaba mapa anema raratsü aser nüburtem anitsü jenjang tongtetogo aser grass root nung aliba nüburtem asoshi onoki inyaktü aser nübur nungia yamaji onoki imlar", ta paisa shisem.

Taruba MP Election atema terenemshiba koma lir? ta metetnüa asüngdangba ka langzüdang, "tang tashi nung tejangrar parnok 6 lir. Tejangrartem dang onoki mepishiba kaji grass root nübur aser nungdakbapur dangi oa parnok nungi temelaba agiang ta shia lir, nübur ola mangadangibo onoki telemtetba magitsü", ta NPCC tir-i ashi. Iba dak sentakba nung candidate bushiba telok ka shimja lir, anungji, parnoki tajungtiba asadangtsü imlar. Aji oda, shiba südir süaka, nisungbaji Nagaland atema bilemer aser nübur meimer ka shimtsü, ta paisa shisem.

ULB dak sentakba nung NPCC-ia kechi ashir? ta asüngdang, "Nagaland Municipal Act tasenbaji merenem tashibo onoki kecha meshitetsü, saka drafting committee-i nübur taginüba ama tajungtiba nung renemer arutsü imlar", ta pai langzü.

Aruya aliba MP election nung party kar den lokteper inyaktü asü ta asüngdang dang, high command-i kechi tetuyuba agütsüdir iba yayim nungji anitaksüsa akümtsü saka communal party talisa BJP amala party denbo onok anasa marutetsü, ta paisa shisem. NPCC tir sülen party tenzükertem lenla tabensa nungi ketdangpurtem anitak jajadaki.

TSÜRABUR TSÜKILEMBA (KELINGMEN) DEN ASÜPILA SENTONG:

Name : Tsükilemba Tzudir
Asoba anogo : Anjeti 7, 1931,
Asüba anogo : Rongjui 12, 2023
Tepila sentep : Rongjui 13, 2023.
Mokokchung Salangtem ward,
Anepdang : 9:00 ako.
Kelingmen : 11:30 ako.

Nagaland Police-i Helpline Number atema metetdaksür

Dimapur, Rongjui/Sept. 12

(TYO): Senotsü tsütsü Ken o benoker temi pei indang ashikülak mapa inyakba osang agütsütsü aser ashikülak mapa inyaker indang account soita ayutsü mechi Indian Cyber Crime Coordination Centre (I4C), Ministry of Home Affairs ajanga helpline number 1930 amenokogo, ta Nagaland Police ajanga sangdong ka nung ashi.

1930 nem kera osang agütsüra, sen meyipa angutsü teimla lir. Tanü tashinung 1930 dangi iba amala ashishitep ken o 241 agüja lir. National Cybercrime Reporting Portal (NCRP) i.e on www.cybercrime.gov.in nung ken o 74 zülüoka lir. Ibai ajanga ashishitep ken o agütsür temi ken o zülüokba maparen tembanga meinyakba sayur, ta sangdong ajanga ashi.

1930 nung call asüba sülen nüburtem dangi pei indang phone number nung NCRP

portal indang SMS link arutsü. Ken o benoker temi pei indang ken o ya NCRP portal nung ghonda 24 tsüngta register mesüra, parnok indang ken o ya NCRP nung mezülüoktsü, ta Nagaland Police ajanga ashi.

NCRP portal nung ken o zülüokba ajanga sen meyiba agütsütsü asoshi inyaksangshiba nung Police department nem lenmang tesatempa lapoktsür.

Nüburtem/timtem ajurur alirtemi FIR benoktsü nungnanga bilemba angur. Ken o benoka bushisüngdangba nung nübur/timtem ajurur alirtemi bushisüngdang den amalitep akatsü ajungshir, ta sangdong ajanga ashi.

Senotsü ashikülaka agiba dak sendakba nung nüburtemi 1930 nung call sür ken o benoktsü akok aser ano www.cybercrime.gov.in nunga ken o agütsütsü akok, ta sangdong ajangasa ashi.

DC & DEO Kohima-i election ketdangtsür dang taa meshitsü metetdaksür

Dimapur, Rongjui/Sept. 12

(TYO): 14th Nagaland Legislative Assembly Election, 2023 dak sendakba nung Kohima District kübok Reserved Polling Personnel, Counting Supervisors, Counting Assistants aser Tabulators ajanga dang Office of DC & DEO Kohima, (DC

Office Top Floor, Election Branch) nungi September 15-18, 2023 anogotem office mapang taa (renumeration) meshitsü metetdaksür, ta Deputy Commissioner & District Election Officer, Kohima, Shanavas C IAS ajanga sangdong ka nung metetdaksü.

Mumbai nung Nagaland House semdangtsü anogo thinener

Dimapur, Rongjui/Sept. 12

(TYO): Navi Mumbai nung aliba Nagaland House jenjang/tia tsüngtong oa repranga asadangtsü asoshi Kuzholuzo Nienu, MLA aser Chairman of the Committee on Government Assurances

(2023-2024) ajanga September 20-23, 2023 anogo shimteta liasü.

Ajisüaka 14th Nagaland Legislative Assembly indang Session tanabuba aliba mechi thinena atar, ta sangdong ka ajanga metetdaksü.

AICRP Honeybees & Pollinators, SAS NU sempet ana angu



University of Agricultural Sciences, Bangalore nung September 4-6, 2023 anogotem Annual Group Meeting cum Annual Workshop alidang Dr. Avinash Chauhan, Principal Investigator, All India Coordinated Research Project on Honey bees & Pollinators ajanga Project Coordinator, ICAR nungi sempet agizükdang tangokba noksa nung angur.

Dimapur, Rongjui/Sept. 12

(TYO): Bangalore nung

September 4-6, 2023 anogotem Annual Group Meeting cum

Annual Workshop alidang SAS, NU nung aliba All India Coordinated Research Project on Honeybees & Pollinators, Medziphema Centre ajanga sempet ana ngua liasü.

Iba sentong nung linük tesem balala nungi centres 26 tashi arua shilem agi aser yangji AICRP Honeybees and Pollinators Center, School of Agricultural Sciences (SAS), NU Medziphema, Nagaland sempet ana ngua liasü.

Mezüngbuba sempet ya 'Best Presenting Centre 2022-23' aser tanabuba sempet ya

'Best Reporting Centre 2022-23' alitsü.

Mapang ka nung centre kati sempet ana tashi ngutetba tang ya mezüngbuba alitsü. Taoba küm 2021-2022 mapang AICRP Honeybees and Pollinators Center, School of Agricultural Sciences (SAS), NU Medziphema nem 'Best Reporting Centre' sempet agüja liasü.

Item sempet ya Dr. Avinash Chauhan, Principal Investigator, All India Coordinated Research Project on Honeybees and Pollinators (AICRP{HB & P}),

SAS, NU Medziphema campus ajanga agizüka liasü.

Iba sempet ya Project Coordinator cum Member Secretary ICAR, New Delhi, Dr. Sachin S. Suroshe, Expert Committee members aser danga tongtipang nisungtemi agüja liasü.

University nem konang tetushi bener arutsüba asoshi Pro Vice-Chancellor, SAS NU, Medziphema Campus, Prof. Akali Sema aser Head, Department of Entomology, Dr. Imtinaro L. den SAS, NU nung alirtem ajungai tenüngsang agüja liasü.

Rajnath Singh-i Infra Project 90 lapoktsüogo



New Delhi, Rongjui/September 12 (Agencies): Defence Minister Rajnath Singh-i Mongolbarnü Jammu and Kashmir kübok Samba district nung Border Roads Organisation indang infrastructure project 90 lapoktsüogo. Item project tem ya sen crore 2,941 intoka yangluogo.

Singh aser Prime Minister office nungi Minister of State Jitendra Singh na Jammu airport nung Lt Governor Manoj Sinha aser Army aser Indian Air Force (IAF) ketdangsurtemi agizüka liasü.

Rajnath Singh-i, Samba district kübok Bishnah-Kaulpur-Phulpur lenmang nung meter 422.9 talang state-of-the-art Devak apu den tanga project 89 virtually lapokja liasü.

Devak apu ya defence force tem atema kanga dang

tongtibang apu ka lir aser iba ajanga sepaitem, hadir tulutem aser mechanised vehicle tem takaraba nung senzusenpongtsü atema teyari agütsü aser iba ajanga iba tesem lenla ajak nung renlokyonga aotsü, ta BRO otongdar kati ashi.

BRO project tem rongnung lenmang 22, apu 63, tunnel ka, airstrip ana aser helipad ana densema lir. Item project tem ya north len Union Territories aser north east kübok arrtsü nung aliba state 10 nung benoka inyakogo.

Virtually lapoktsüba project 89 rongnung 36 Arunachal Pradesh nung, ladakh nung 25, Jammu and Kashmir nung 11, Mizoram nung pongu, Himachal Pradesh nung asem, Sikkim, Uttarakhand aser West Bengal nung anana aser Nagaland, Rajasthan aser Andaman and Nicobar Islands nung kaka

densema lir ta ketdangsurtemi ashi.

BRO-i otsütsüsa item tongtibang project tem kanga kara inyakogo aser project aika working season ka nung dang state-of-the-art technology amshia yangluogo, ta otongdar-isa ashi.

Pai ashiba agi, Arunachal Pradesh kübok meter 500 talang Balipara-Charduar-Tawang lenmang nung Nechiphu Tunnel aser tang yanglua aliba Sela Tunnel ajanga Tawang temeket nung aliba tesemtem nem tsüngküm mongpu ajak nung amshitetba lenmang ka agütsü aser iba ya sepaitem aser tawang semdangba alima penzurtem ajak atema tajangzük asütsü.

Defence minister-isa, Ladakh anütoklen Nyoma airfield atema nungshilong azüngtsüogo, koba sen crore 218 intoka yanglutsü.

Business summit ka nung adentsü atema Mamata Spain-i ogo

Kolkata, Rongjui/September 12 (Agencies): Anogo asem agitsü aliba business summit ka nung shilem agitsü atema West Bengal Chief Minister Mamata Banerjee Mogolbarnü Madrid-i apusoago.

Madrid-i aotsü atema tayimtsüi matu tsüngda CM Mamata Banerjee-i ashiba agi, "küm pongu sülen onok Spain-i aoer. Spain ya Kolkata Book Fair mapang partner ka liasü. Spain nung kanga dang takok ngua aoba manufacturing industry lir. Iba sentong nung shilem agitsü jaokba sülen onok aoer. Kechi jenjang ka agitetdir ata lidi," ta lai ashi.

Bengal Business Summit November 21 nungi 23 tashi agitsü renema lir.

"Spain nunger ketdangsurtemi Bengal aiben semdangogo, saka onoki kasaji telangzüba magütsü, anungji ni Spain-i aoer. Dubai nunga onok

business summit ka nung shilem agitsü," ta laisa shisem.

Maneni Chief Minister-i, Spain nung business summit ka nung shilem agiba ajanga tajangzük angutsü imlaba lemsatapa liasü.

Kasa mapang nung Hombarnü CM Banerjee-i ashiba agi, Jalpaiguri district kübok Dhupguri jila ya 2023 küm tatem tashi nungbo subdivision ka kümdaktsütsü.

Taoba hopta TMC-i Dhupguri menden atema assembly by poll kokogo. Trinamool Congress candidate Nirmal Chandra Roy-i, Bharatiya Janata Party candidate Tapasi Roy vote 4309 agi koka liasü. Nirmal Chandra Roy-i vote 97,613 angu aser BJP candidate-i vote 93,304 ngua liasü. Iba election nung CPI-M-ia shilem agi aser parnok tasembuba jenjang nung tembanga liasü.

PoK India den pasasa longjemtsü; VK Singh



New Delhi, Rongjui/September 12 (Agencies): Union minister aser taoba Indian Army chief VK Singh-i Mongolbarnü ashiba agi, Pakistan-occupied Kashmir mesüra PoK ya pasasa dang India den longjemtsü. India den Kargil border crossing lapoktsütsü atema Shia Muslims temi akhangba indang asüngdangba langzüba mapa pai iba olen ya lemsatapa liasü.

"PoK ya India den pasasa dang longjemtsü, mapang tatsüka ata liang," ta Singh-i Rajasthan kübok Dausa nung Bharatiya Janata Party (BJP) indang Parivartan Sankalp Yatra sentong ayongzüka agiba mapang osangbenertem den sensaksemba mapang ashi.

PoK ya Azad Kashmir aser Gilgit-Baltistan ta tesem ana küma lemsar lir. PoK nung nütsünyongsük million 4.5 shi lir. Nütsünyongsük shilem 97 muslim nungertem lir aser tanungba shilem asem ya Hindu aser Khristan tem densema tanga loktitem lir.

Singh-i iba olen lemsatetpa dak sendakba nung Shiv Sena (UBT) MP Sanjay Raut-i ashiba agi, PoK ya India den longjemra iba telemtetba ya pelashishia agizütsü.

"Asenok ajaki 'Akhand Bharat' ka asoshi yongya arudar. Asenoki PoK ya asenok meyong ta shia arudar. Ajisüaka pai Army chief mapa bener aliba mapang PoK ya asenok meyong kümdaktsütsü atema

merangdatsür asü. Pai kodaser tang inyaktetsü," ta Raut-i osangbenertem dang ashi.

Raut-isa, Manipur nung azütokshi lendong ataloker aliba dak sendakba nung centre sorkar aitsüogo. Pai, "iba jenjang ya agitetra onoki pelashishia agizütsü, saka aji masüdag Manipur sunepa kümdakja," ta ashi.

Paisa, China-i Manipur, Ladakh aser Arunachal Pradesh tongogo ta shia sorkar dang iba ya tama nokdangtsü ashi.

Paisa, China-i parnok indang map nung Arunachal Pradesh inoksemba jembiba mapang China-i northeastern state shilem kar parnok litsü ama sayuogo ta shia sorkar dang iba ya tama nokdangtsü ashi.

Maneni pai, "iba sülen PoK India nung pasasa longjemtsü aser iba atema na nungdak mali," ta ashi.

Delhi minister Saurabh Bharadwaj-ia, Union minister ya aitsüogo aser ashiba agi, Singh-i China dak linük meranglokdaktsütsü meranger. "VK Singh-i China dak linük meranglokdaktsütsü meranger. China-i India litsü shilem tuluka agiogo ta tejangja. Ladakh indang SP report ka ajanga ashiba agi, Indian Army inyaksangshia aliba tesem 66 nungi 26 nungbo inyaksangshi mesüteti kümogo. General Singh-i, China-i India atsüngba indang tama jembitsüla," ta Saurabh-i ashi.

Bajrang Dal züngsem Monu Manesar Haryana Police-i puogo



New Delhi, Rongjui/September 12 (Agencies): Bajrang Dal züngsem Mohit Yadav shiba dang Monu Manesar ta ajar pa ya Nuh nung kin ana tsüngda mangatetp adokdaktsütsü atema rongmesoba atema aitsür liasü, pa Haryana Police-i Mongolbarnü puogo.

Haryana Police-i tang tashi nung osang kecha agüja mali saka Bajrang Dal parent organization Vishva Hindu Parishad ketdangpurtemi PTI dang Manesar ya Gurugram kübok Manesar nungi pua benerogo.

Pa ya nisung tepetba ken o ka nung Rajasthan Police-ia bushia liasü.

Nashi jang shishilembar Junaid aser pa adianu Nasir na pua bener oa tepetba ken o nung tangar nisung 21 den Monu

Manesar-a aitsür liasü, saka pa ita pongu tashi meputeti liasü. Junaid aser Nasir na ya February 16 nü Rajasthan kübok Bhiwani tesem nung gari terongtok ka nung rongseter lia nguteta liasü.

Bharatpur SP Mridul Kachawa-i ashiba agi, Manesar pua aliba indang Rajasthan Police-i osang angazükogo aser parnoki Haryana Police den tongtepratepar.

"Haryana Police-i Monu Manesar pua aliba osang onoki angazükogo, shiba Nasir aser Junaid na tepetba ken o nung aija lir. Haryana Police-i maneni temzüng ozüng kübok timyaksü maparen ajak benoka inyakdar aser onok ketdangsurtemi parnok den tongtepratepar. Inyakyim tembangba sülen onok indang District Police-i parnok inyakyim tenzüktsü," ta

Kachawa-i ashi.

Manesar-i, Bhiwani nung nisung tepetba aser Nuh azütokshi lendong nung pa densema mali ta shia arudar. Nuh nung procession ka ayongzüka agiba mapang mepetmesü atokba dak sendakba nung pa tenüng tema atokba sülen Manesar-i ashiba agi, pa iba tesem nung maliasü aser pai tesempatep adoktsüsa o kecha mejembi.

"Haryana kübok Nuh Mewat district nung Bajrang Dal aser Vishv Hindu Parishad (VHP) indang procession ka lokti kati maka azütokshi lendong atalokba ya kanga tia maka. Iba tamangba yimsü dak sendakba nung inyakyim ya Haryana kübok Mewat tesem nung küm asem tashi agia aruogo," ta pai taoba ita HT dang ashi.



TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 13, 2023

Nagaland nung Opposition nungdaker

- P Tiamongba Aier

Opposition maliba 14 buba Nagaland Legislative Assembly monsoon session koma tembangtsü ta nisung aikati repranga ataba mapang ka tang ya lir. Nagaland nung opposition maliba sorkar tanaben kümteter assembly session tanabuba agir. Taküm March ita nung budget session agia liasü aser iba sülen tang monsoon session agir, saka session ana tsüngda ita 5 lia arudang sorkar ketmung kecha balaka mangur. Nagaland nung gari lenmang tia kasa dang, sorkar office ketdangsübaren nung temelenshi kecha majiteter, sorkar mapa inyaker nem mapang shitak nung itasen magütsüteter, political party balalai election jakdang nangzükbatem mapa kuma inyakba mangur. Saka tesasatsükaji assembly nung ola adoker mali. Hao, monsoon session tenzükba anogo nungi opposition meliaka MLA tem tsüngda tasüngdangba aser telangzüba agütsütepba mapang agia arudar, saka iba ya tazütsü atema inyakba mapa ka ama dang bilemer. Kechiyong "ni nü dang iba onük asüngdangtsü" ta MLA kati bangdak department abenba MLA dang jelia shia atar iba amaji assembly nung telangzüba kanga junga renema bener arur langzür, iba ama sorkar inyakyim ajangabo public ajangzüktsüsa mesüra ajangtsü mapatem takok ngua inyaka moutettsü ama bilemer. Kechiba iba tebilemtsü khuret lemsateper ta süra sorkar menden nung meraketa mena aliba MLA tem ya asenok nübortemi shimteta mendaktsürtem lir anungji parnoki masüba ka inyakdang mesüra nangzükba ama meinyakdang mesüra aibelena inyakdang nübortemi ola adoktsü tim. Nagaland nungsa NGO/Union, civil society aser item mesükba pressure groups teimtiba tenteta lir. Ano kin ajak madak ketdangsüba hohotem den ang kin dak sendakba telok balala tenteta lir. Süra, opposition maliba sorkar ka asoshi item telok yagi tangatetba tajung nung nübortem ajangzüktsü aser ajangtsü atema opposition mapa inyaktsü khuret lir masü na? Asü sorkari kechi shidir ajak hai hai ta dang tashi angaa anidaktsü. Tatishitsü ka- Nagaland nung district aika den sendaktepba gari lenmangtem kanga mejungi aliba indangbo jembir, sorkar aser bangdak department-i temulung agüja inyaktsülaja tabo shiditem zülur, osangkakettem nunga adoker saka tenoktenoka aser züngzünga sorkar mesüra bangdak department nem mapa inyakdaktsütsüsa merongshiteter. Atangji nübortem asoshi, public asoshi, pei kin asoshi ta ser tenteta aliba teloktem aser item telok nung ketdangpurtemi sorkar tsüngdang pei nübor, public, kin asoshi ola adoktsüla aser nungdaktem peritsüsa mapa inyakdaktsütsüla. Saka tang amai dang opposition maliba sorkar assembly session ya agidakja ora, nübor aser public ajangzüktsüsa mapa kecha balaka meinyakdang taruba election tongadoktsü. Anungji taruba session nungibo opposition maliba sorkar asoshi opposition tesashi ka noktaka yur telemtetba balala agia, tasüngdangbatem asüngdanga assembly session agitsüsa Naga nunger loktitentetem aser item ketdangpurtemi tang nungi iba tangatetba yur nübortem aser public asoshi inyaktsü ajangmesor. Sorkar loksa odaktsütsü atema masü, chirepdaktsü asoshi masü, sorkar anema apusotsü atema masü saka public ajangzüktsü aser jungdaktsütsü atema Nagaland nung opposition tajung ka alitsü kanga nungdaka kümogo.

OLEMSABANG

KHRISTAN LIMA TA ASÜBA TENÜNG YA KODA JANGRATENTSÜKA

- R. Nungshi Longkumer

Asen Naga Lima dang Khristan lima ta ajar, iba tenüng tajung angashidangbo asen shi temang nung timtim tera dang alibo serep ta junga atoker. Anungji iba tenüng tajung ya shirnoki, kodang, kong jatet ta ni temeteter nisung kar dang asüngdang nung parnokia shidakba tejangja jibo meshitet. Saka parnoki ashiba agi 1975/76 mapang Langpangkong Tzükong Changtongya lima nung revival mapang nung jatetba alitsü südi ta ashidang ibaji shidak asütsü ta kü mulungjangia jet ta bilemteta ait. Kechiyong nia iba mapng nungjibo arishi küm semerbo (30 years at that time) junger liasü. Anungji nia meteta Tsüngremer taochi nung Changtongya lima nung revival milak tulu jangrua nisung jendi pei temenen nungi temulung meyipba Khrista agizük aser asen Ao lima nungbo 99% Khristan akum, aser iba revival nung takotet sayutsüngir parnok ana asema kanga dang tasü ita joko dang nungibo asen Naga lima dang Khristan lima ta ajatsü aser ano Naga nungerji Khrista asoshi alitsü ta telemtetba takang renema ayu. Item missionaries tem yangi ni tenüng magütsüaka parnok rongnung kar sür alitsüa akok ano karbo taküm alitsü südi. Parnok nem asenok ajaki tepela tenungsang tulu agütsüdi.

Idang nung jagi tenzuka asen Aoertemi iba Khrista osang tajungji bener Naga lima ajunga dangi ano alima tesem balala dangi osang tajungji perokyonga ao. Saka temeimtsüka iba osang tajung bener sayutsüngi aor asen tsüraburtem Tuensang lima nung, Zunheboto lima nung Indain army tesashi ajurua parnokji pur (detained) tesüngmangtsüka züka merenshi, jail nunga pouka ayu. Teselen jail nung jagi jioker pei limai meyipa arur kulenbo kar iba timtim jagi arishi yakta tema adok aser mesui alirtema iba zübuji bener kanga dang timtima ozü yimdaka ano tambur karbo lir. parnoki pei taküm mapayui tenla agüja iba Naga lima temenen tammang (from the bondage of sins) nungi tesangwa dangi alangzüka yutsübayong tanü asenok iba temoatsü manung liyonga arudang Tsüngrem tenüng sangdi aser tsüraburtem nem-a tenungsang agütsüdi.

Saka tanü asenoki iba tenüng tajung ya menena tesempatsü lima kümdaktsüra koda tesasatsü asütsü. Hauku, asen Naga lima nungi missionaries tem tajung jenti adokyonga odaki, ano tamangertema kanga dang renlokyonga aoba angudang kanga dang pelaa repranger. Saka ano kulen reprangdangra iba lima tenung tajung menena kümdaktsüba temenen mapa tamajungtem angudang kanga jashiasa bilemer.

Itemji kar shidi:

Küm ter jika süia ogo, tata gari tasen ka Gari tekolak nung Yisui kümzüker (Jesus Saves) ta zülur tesem ka nungi tesem kati apusoa aoba mapang gari driverba O handyman tena prongla asen Naga nunger asangur janutem dang liasü. Tena prongla yi agi jungjunga mesepa jemer apuso. Gariji apusor kilometer anashi dang orbo gariji len tekepok leni ia adok. Aiben dang meküpbpa lur gari-tsüng (tyre) anünglen sür meküptaka ayu. Iba gari lenmangji kanga dang tongtipang ka asünung yakta dang süisüponger aika dang senteper yaritepa liasü saka driverbabo suadoker liasu aser handyman ba kanga dang mejungi yirur yaritepba angu. Jesus Saves ta zülür alibaji lendi nungi jangja-jangjaa ngua liasü. Nibo kanga dang mepelai nema medangi repranga kazüoko, saka gariji tai masü saka asangur Khristan anaji tai liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung kiralongrar temi tamanger ana tepset, aika yirutsü

Abuja, Rongjui/Sept. 12 (Agencies): Taraba state, Nigeria nung jila kati kiralongrartem Deobar (September 10) anepdang 2:00 ako nung aita Khristan ana tepset, aika yirutsü aser nisung trok pua bener ao, ta osang ajanga ashir.

"Kiralongrar temi Jalingo nung aliba Mile Six area nungi tamanger nisung trok pua bener ao. Item kiralongrar yagi Khristan ana, Balanko Alex aser pa kinungtsü tepset aser ano tamanger aika yirutsü," ta yangji alir Emmanuel Moses-i Morning Star News dang text message ka ajanga ashir.

Ano yangji alir John Hussaini-ia kasa osangji ashir aser Hokulbanü (September 8) Manya aser Gangum tsüngta Takum Road nung Khristanpur ana pua bener ao, ta ashir.

Taraba State Police Command indang odongtar Abdullahi Usman-ia September 10 nü apuani tepsetba aser nisung pua bener aoba jangjatsüogo.

"Prangbong bena alirtem Balanko Alex'er atsü telungi ai aser pa kinungtsü tena tepset aser dangartem pua bener ao. Mapa tamajung inyaker aputsü police temi mera balala agitagai," ta Usman-i sangdong ka nung ashir.

Fulani nung shiruru metsür

aser danga kiralongrar temi June 25 nü Taraba state kübok Takum jila nung Khristanpur 20 tepseta liasü.

2022 küm tamangba yimsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List osang ajanga ashir.

Ano Khristanpur pua bener aoba (4,726), tashiyim amshiba mesüra merenshiba, tashiyim agi kibong akumba mesüra shi aser tekolok timtemdaksüba nunga Nigeria ya temaba jenjang nung lir, aser tamangba yimsü mechi ki aser shishilempadak tesemtem raksatsüba nungi tema nung lir. Tekülem ki raksatsüba aser linük telung nung timtem balala mechi tesem balala nung prokshiba tsütsüa Nigeria ya tanabuba jenjang nung lir.

2023 World Watch List ajanga alima nung Khristanpur alitsü tamajungtiba linüktem asadanga rongnung Nigeria ya jenjang trok buba nung lir, koba taoba küm jenjang tenet buba nung liasü.

"Fulani, Boko Haram, Islamic State West African Province (ISWAP) aser danga telungpur temi Khristanpur aliba tesem amaker, tamangertem tepseter, tetsüng-tepen alok-alatsür, tashiyim amshia shi nung

medemer aser rongsen agi alangdaksütsü meshia pua bener aor mesüra alar ama ayur," ta World Watch List ajanga ashir.

"Taküma linük south tsütsü Khristanpur timba aliba tesemtem nung azüdokshi ya maneni lir... Nigeria sorkari tamangba yimsü nung ajemdaker reshikangshia mamshir ta maneni tekong meranga nokdaker, anungji Khristanpur temeden nung aitsüba memerenshi yutsür."

Nigeria aser Sahel nung Muslim Funali nungertem timba lir aser parnok ya kin-kidong noklang aika lir aser balala nungi jakzük aser item Fulani nung kari Islamist ideology retreat amshitsü meranger, ta United Kingdom indang All-Party Parliamentary Group of International Freedom or Belief (APPG) ajanga 2020 report nung shia liasü.

"Parnoki Boko Haram aser ISWAP den mesüktepa tasa amshir aser Khristanpur dak tenük yokba tejangja sayur," ta APPG report ajanga ashir.

Khristanpur meyong ali tashiyim amshia rakzüksü aser Islam yimsü amangdaksütsü nükjidong nung shiruru metsürtemi Nigeria indang Middle Belt nung Khristanpur dak amaker, ta Nigeria nung Khristan lenirtemi ashir.

ANO GO ABEN TSÜNGREM DEN

Ataa aliba aser teimla

T.Ken 130:1-8

Nai punlang tonga luogo ta bilemdang, T.ken 130 ji zügang. "O Kibuba, telung tarok nungi ni ne dang ayimten" (t.1). Iba ken nung tanü asen mulungjang nung nungdakba asem mepishi.

Mezüngbuba, ken züluri ashir, "Kibuba, kü ola angangma"(t.2). Kechiba? "Ni tzü awatsü mashi; ni tzü tarok dak lir, aser parnok kü kolak manung arudaki. Ni araksettsü tsübur, aser ni ibaji tsübur". Kecha masü na kopiga taroki ludir luang, Tsüngremi na ayimdenba angashir.

Idangji Pai ashir, " Kibuba, tai menaba nai sükdangdi süra. O Kibuba, shibai noktaktettsü? Saka ne tsüngken atsütsüsa, ne dak tatok lir" (t.3,4). Asenoki Tsüngrem ochi o bendangdak tatitang nung menoktaktettsü; asenok teyimla maka. Yisu Khristai dang idakji nokdaktettsü, kechiaser pa dang tabensa lir. Saka pai asenok den noktaker; pa asen kütetdakba lir. Tsüngremi asenoki tarok nungi ayimtenba dang angashir masü saka Pai asenok sotter. Pai ashir, "Ni ne dang tai adoker. Nai kü chir dak amang; nai ne temenen nangzük; aser tang nai kü matsüngdang nokdaktettsü". Ken züluri iba ochi nung Pai amangba ashir: "Kibuba asoshi ni atar, kü nelai atar. Aser pa o nung ni yimlar. Tanukertemi sangwatsü yongyaba dang nungi taoba kü nelai Kibuba asoshi yongyar" (t.5,6).

Tanaben Pai asüngdang, "O Israel, Kibuba dak yimlaang: Kechiyong Kibuba dak yimlibilem lir. Aser pa dak talubusa tekümzük lir" 9t.7). Ken asenok sepoy mitsa nung nokdaker sangwatsü yongyaba ama lir. Asenoki angutsü makok, saka Tsüngremi angutsü akok, aser idakji pa pur asoshi tarutsü teyimla lir.

Tsüngrem o tenangzükba nung ne tamang yuang. Na lulaa liaka kecha masü, Tsüngremi ne dang angashir, na sotter aser yarir. Pa dangi meyipang; Pai na yaritsü.

Coco Gauff-i US Open akokba sülen apudaka sarasadem



America tsür Coco Gauff-i Honibarnü 2023 US Open tennis asayamong final nung Aryan Sabalenka madak takok anguba sülen apudaka sarasademba noksa nung angur.

New York, Rongjui/Sept. 12 (Agencies): 2022 French Open final nung tamakok ajuruba ya Coco Gauff asoshi tejashitsü mapang ka liasü. Saka Honibarnü la ano Grand Slam final ka nung liasü, aser iba mapang lai kanga junga asayatet.

US tsür tennis asayar arishi küm 19 tain Gauff-i Aryna Sabalenka madak sets asem nung takok ngua la asoshi mezüngbuba Grand Slam title ngutet aser 1999 küm Serena Williams sülen American teenager-i iba asayamong mezüngbuba akokbaji la akum. Set mezüngbuba nung 6-2

agi tamakok ajuruba sülen seeded trok buba nung alila Gauff yagi sets tanabuba aser tasembuba amokbanga asaya second seeded Sabalenka tsükdaksü.

Iba asaya tembangba sülen Gauff molungjang tepela agi sünger nüktzü yima court nung khen longdak aser iba sülen telok alileni asema oa lar kinunger aser coaches dak azüit. Iba sülen la court-i asema aru aser la indang menden nung apudaka Tsüngrem dang sarasadema liasü.

Iba sülen ESPN nungi Mary Jo Fernandez-i Gauff dang la

tamang indang asüngdang dang, "Kü tamang ya kanga tongtipang lir. Ni asaya nung takok angutsü asoshi sarasadem masür, ni tajungtiba nung asayatsü asoshi tashi meshir aser kechi ataloktsü ali aji ataloker. Iba takum nung ni moatsür. Anungji ni iba mapang atema pelar," ta lai langzü.

Gauff lanuwa nungi US Open asayamong nung tebo tena arua Venus aser Serena Williams nung takok ngua asayaba repranga liasü. Arthur Ashe Stadium nung arua künü championship trophy ajungkettsü la indang mangdang liasü.

"Iba takokba ya ni asoshi onsara lir. Ni tera süngmanga lir. French Open nung tamakok ajuruba du ni asoshi temolung raksaba mapang ka liasü, saka Tsüngremi na timtem balala ajanga anir ta ni angatet aser iba yongji tang ajangshiba ya tajungba lir," ta lai ESPN dang ashir.

Gauff ya professional tennis nung May 2018 nungi arishi küm 14 asüandang nungi shilem agia aru aser iba sülen lai anogoshi la takum aser tennis asoshi lai Tsüngrem dak amangba tongtipang lir ta ashitsü akmesena meliasü.

Lai osangbener balala den sensaksemba mapang la nüburtemi meteta akumdang tamang ajanga la ajemaludaksü ta shia arur aser item sapang amshia lai Tsüngrem indang lemsateper.

2019 küm New York Times den sensaksemba mapang, asaya tenzüksü lia tebo tena teti sarasadem, ta Gauff-i shia liasü.

"Ni arishi küm ti asüba mapang nungi asaya tenzüksü lia kübo küna külemi sarasadem. Künati takok angutsü atema sarasadem masü, ni aser küden asayatsüpur kumzuka ayutsü asoshi sarasadem. Aser asaya tembangba sülen maangka agütsüba atema

Tsüngrem nem tenüngsang agütsür," ta lai ashir.

La indang social media sapangtem nunga lai teti Tsüngrem indang jembir aser 2022 season atemdanga yamaji lemsatepa liasü.

"Asenok alir, asenoki angazüker, saka ajakdang tongtipangtibaji asenoki maneni meranger. 2022 season tembangogo aser ni kodanga mamadoktsü. Iba season mapang ajak nung kü nem tashi agütsüba atema Tsüngrem dang kanga pelar. #thebestisyettocome" ta lai zülua laisü.

August ita Cincinnati Open nung Guaff-i Karolina Muchova tsükdakja Masters 1000 asayamong akok. Iba mapanga lai Tsüngrem nem tenüngsang agüja liasü.

"Ibai tamamangtsüka lir. Talisa küm tetenzüklen Europe nung ajangshiba sülen. Ni kanga pelar aser ni kü Kibur Yisu Khrista nem tenüngsang agütsür. Aonung aika kü kisüng jepa lenmang ngutettsü meranga aru. Ni ano lenmang aika ngutettsüla, saka ni awabangba atema Pa dang pelar."

"Ni tajung dang inyaktüsü meranger aser tamajung nem mokokdaksütsü meranger. Kü tamang ajanga ni kü nükjidong aser ni takok ngunüba nung ranglokteter," ta Gauff-i ashir.

AO OSHI ANGAZÜKDAK:

TANÜ ANGAZÜKTSÜBA OJANG



Saksalem

(adv) tekümdang, mita aliba (alert)

* Asenok ajak tensa tia meteta saksalema alitsüla.

Saktem

(n) tongtibang mapang atema rezüngba chiyongtsü (reserved food)

* Ajungben aener atema teti kidang saktem ayur.

OLONG PAITEP # 6635

Grid for crossword puzzle #6635 with numbers 1-17.

TIPILEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6634 TELANGZÜBA

TIPILEN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.



TESAYUR KA INYAKTSÜ YA TEMELA MASÜ

Tesayur kati School ka nung tanur dang lesson asüngdangar:

- Tesayur : Sugar amshia sentence ka yangluang
Tanur : Ni tanep sungo jemogo.
Tesayur : Sugarji kong lir. ?
Tanur : Sugarji süngo nungji lir.
Tesayur : Tanü asenok agitsüba lessonji PHOTOSYNTHESIS. Iba ya kechi?
Tanur : Ibaji tanü agitsüba lessonji
Tesayur : John mango aongtsüba süngdongi atur. Mango agi tenzüka sentence ka yangluang
Tanur : Mango na aongtsüba John süngdongi atur.
Tesayur : Ner oshi nung mosquito dang kechi ajar. ?
Tanur : Onoki mosquitoji majar, parnoksa tang arur.
Tesayur : Nüburi sembaba nation ji kechi.
Tanur : Exami-NATION.
Tesayur : Asenoki asen School koda meruka ayutsü ?
Tanur : Kidang tang kazüba agi
Tesayur : Künübosa asen lima ya corruption free lima ka akümtsü. Iba ya kechi tense ?
Tanur : Future impossible tense.
Tanü Putu nung tesayur ka inyaksü temela masü.

Lilir : Mail

Rajnath Singh-i Arunachal nung Nechipu Tunnel lapoktsü



Defence minister Rajnath Ringh-i September 12 nü Arunachal Pradesh nung Nechipu Tunnel lapoktsüogo.

Itanagar, September 12, 2023 (Agencies): Defence minister Rajnath Ringh-i September 12 nü India ajungalen infrastructure projects 90 tashi sayatsüogo aser item rongnung Arunachal Pradesh nung Nechipu Tunnel dena lir.

Border Road Organization (BRO)-i Rs 2941 crore endoka mapatong 90 inyak aser item mapa ya North nung border states & union territories den Northeast nung inyakba liasü.

Mapatong 90 nungi Jammu and Kashmir nung 11, Ladakh nung 26, Arunachal Pradesh nung 36, Mizoram nung 5, Himachal Pradesh nung 3, Sikkim, Uttarakhand, o West Bengal nung anana aser Nagaland, Rajasthan, o Andaman and Nicobar Islands nung kaka lir.

Kanga dang tongtipang Nechipu Tunnel ya West Kameng district nung Balipara-Charduar-Tawang (BCT) road nung lir.

Arunachal Pradesh nungsa Sela Tunnel yangluba maparen tatemleni arudar.

Arunachal Pradesh nung Sela tunnel ya tan September ita tatemlen lapoktsü sentong lir.

Arunachal Pradesh nung Sela tunnel ya Border Roads Organisation (BRO) ajanga inyaker.

Arunachal Pradesh nung Sela tunnel aser Nechipu tunnel ya China den arrstülen connectivity tajungba akümtsü atema yanglur.

Tripura nung BJP MLA 2-i tezüngzüktep agiogo

Agartala, September 12, 2023 (Agencies): BJP candidate ana- Tafajjal Hossain aser Bindu Debnath nati September 12 nü Tripura Legislative Assembly nung züngsem asütsü tezüngzüktep agiogo.

Legislative Assembly Speaker Bishwabandhu Sen-i tena nem tezüngzüktep agidaktsü aser iba mapang Chief Minister Professor Dr Manik Saha aser Cabinet züngsemtem liasü.

MLA ana züngsemba ajanga BJP aser IPFT teloktep nungi MLA 34 kümogo.

Dhanpur aser Boxnagar

assembly constituency tem by-election nung Bindu Debnath aser Tafajjal Hossain nati takok angu.

Mongulbarnü Legislative Assembly lobby nung tezüngzüktep agiba sentong nung Chief Minister Prof. Dr Manik Saha, Power Minister Ratan Lal Nath, Finance Minister Pranajit Singha Roy aser cabinet minister tem aser MLA tem aden.

Maneni, BJP state president Rajib Bhattacharya aser Agartala Municipal Corporation Mayor Dipak Majumdar naprong iba sentong nung aden.

"Taoba assembly election agiba sülen MLA kati menden nungi sodi agi aser Boxnagar constituency nungi CPIM MLA asü, iba ajanga by-election agitsüsa aküm: ta Chief Minister Dr Saha-i ashi.

"Tawa agiba by-elections nung assembly constituency ana nungi nisung aikati votes enoktsü aser BJP candidate ana nem takok ngudaktsüogo. Legislative Assembly nung onok züngsem 32 aliba nungi 34 kümogo" ta Dr. Saha-isa ashi.

MLA tasen anati pei pei tesem nung nübortem asoshi nendaka mapa inyaksü imlar ta paisa shisem.

Guwahati nung Manipur nung mozü shibelener 3 apu



Guwahati, September 12, 2023

(Agencies): September 12 nü Guwahati nung Manipur nungi nisung ket nung drugs bena aliba apu. Manipur kükbok

Churachandpur nungi Thar (AS 01 FM 7800) gari ka nung mozü bener lower Assam-i aruba osang ka angazük.

Iba osang nung ajemdaker Kamrup kükbok Saraighat

nung gari soter mita repringdang Manipur nungi mozü shibelener nisung 3 apu. Iba sülen Assam nung mozü agizüktsüba nisung asem Sachika Hotel, Amingaon nungi apu.

Thar gari nung heroin seret 2 ser gram 200 tashi pkts/soap case 170 nung miima bena aliba angu. Parnok ket nung bena aliba heroin jenjangji Rs 18 crore shi asütsü.

Iba mapa ya DIG STF Parthasarathi Mahanta lenisüba kükbok STF aser Kamrup Police yaritepa inyak.

Manipur nung Kuki-Zo nung 3 khaset

Imphal, September 12, 2023 (Agencies): Manipur nung September 12 anepdang prangpong abenertemi nisung asem khaset.

Mongulbarnep 8.20 ako meta Ireng aser Karam Vaiphei tsüngda iba lendong atalok.

Iba lendong nung asürtemji Satneo Tuboi, Ngamminlun Lhouvum aser Ngamminlun Kipgen nung liasü ta jangjaogo aser par asemprong ya Kuki-Zo nung liasü.

"Onoki osang tejangja kecha mangazük lir. Tanep 8.20 meta mejangjatetba

nisung kari Ireng aser Karam Vaiphei tsüngda civilian asem khaset ta dang onoki angashia lir" ta ketdangsur kati ashi.

September 8 nü Tengenoupal district kükbok Pallel nung nisung 3 tepsetba aser 50 tema yiruba lendong sülen tanep iba lendong atalokogo.

Trump anema ken o benokba ya yimtenren tsütsü tayang kepzükbä lir: Putin

Vladivostok, Rongjui/Sept. 12 (Agencies): Taoba US tir Donald Trump anema ken o balala benoka aliba ya yimtenren tsütsü tayang kepzükbä dang lir aser item inyakyim ya ajanga American politics nung ochimashi sayur, ta Russia Tir Vladimir Putin-i ashi.

2024 United States tir election nung tokteptsü asoshi Republican telok nungi Trump ya yakbang nung lir, aser pa anema ken o aika benoka lir. Danga ken o aika rongnung 2020 election nung Tir Joe Biden-i takok anguba melenshitsütsü merangba densema lir.

Mongulbarnü Vladivostok, Russia nung Eastern Economic Forum adenshia alidak jembidang, "Trump asoshi, onoki bilembabo tanü kechi ataloker, ya tajung lir, kechiaser iba yagi American political system tashi kumer aliba sayur, aser dangar dang democracy sayur ama mesayutsüla," ta Trump-i ashi.

"Trump dak atalokba ajak ya yimtenren tsütsü reshikangshiba lir. Aser ibaji United States nüburttem aser

alima ajunga jakdang inyaker." Trump küm pezü office nung alidang Putin den tesendaktep tajung lir ta aiben tenüing sanga jembia liasü aser tawa pai tir menden tanaben ngutetra Ukraine rara anogo ishika tsüingta bentettsü, ta shia liasü.

"Ukraine mepetmesü densema Trump-i anogo ishika tsüingta tebilemetsü balala bentettsü ta jembiba asenoki angashir. Aji meinyaktettsü saka tepela bener arutsür. Aji tajung lir," ta Putin-i ashi.

Ajisüaka Trump ya Russia den tesendaktep balaka lir ta jembiba pai khenyongi meshidak ta ashi.

US ya shibai anidir aniaka Russia den tesendaktep melenshitsü teimla kangabo mangur, ta Putin-i nenshia ashi.

"Tarutsü nung kechi imlatsü, shiba tir südir süaka, onoki ashitsü tasak, saka temelenshi kangabo malitsü," ta pai ashi.

Biden administration-i Russia anema ajang-ajanga nokdaker aser rong ajunga 'direction' melenshitsü kanga tasak asütsü, ta pai ashi.

Trump tir inyakba mapang Moscow aser Washington

tsüingta tesendaktep mejungi liasü aser Putin-i 2022 küm February ita Ukraine amaktsü telemtetba agiba sülen Biden lenisüba kübok Cold War sülen ama kuma lir.

Alima nung China tashi ulua akumba Western linüki alentsü merangba nung tamakok ajuruogo, ta Putin-i ashi aser Moscow aser Beijing tesendaktep ajungba tenüing sanga liasü.

"Tanü West-i China terenlok marakzütetü soita ayutsü meranger, kechiaser parnoki asen tempär tajung (Tir Xi Jinping) lenisüba kübok China kanga kera renloka aoba angur. Iba yagi parnok aoksatsü," ta Russia leniri ashi.

"China indang terenlok ajemdaktsütsü asoshi parnoki mapa ajak inyaker, saka ibaji tamakoktsü. Parnok kanga menuogo. Train ayamesogo."

Ano Putin-i sangdong danga ka nung, West-i Ukraine nem cluster bombs aser depleted uranium munitions agütsütsü telemtetba agiba ya mapa tamajung ka lir aser iba yagi rara talangba kumdaktsütsü saka temelenshi malitsü, ta ashi.

Libya tzümetsüing lendong nung asür 3,000 shi jungogo

Tripoli, Rongjui/September 12 (Agencies): Libya anütoklen tzümetsüing tesashi ka aruba sülen nisung 3000 shi süogo aser nisung 10,000 samar bushidar.

Libya indang Red Crescent otongdar Taqfiq Shukri-i Mongolbarnü ashiba agi, tzümetsüing nung nisung 2,084 asüba jangjaogo.

Kasa mapang nung IFRC tekolakba Tamer Ramadan-i ashiba agi, tang tashi nung nisung samara bushir 10,000 jungdar.

Tang tashi nung nisung 20,000 shi pei talidak ki toktsür prokshio. Benghazi nung amendaker aliba Libya indang eastern administration-ibo iba tzümetsüing lendong nung nisung 3000 shi asüba asatetogo.

Linük yimtiba Tripoli nung Government of National Unity Ato Kilonser Abdul Hamid Dbeibah-i Mongolbarnü sangdong ka ajanga tenüingdakba osettsüt tone 14 aser medical personnel tem anir tayimtsü ka Benghazi-i apusoago, ajisüaka tzümetsüing agi tamajungtiba konshir aliba Derna yimti-i aotsü atema maneni tetsükdaktsü lir, ta ashi.

Relief convoy tem linük anüolen nungi anütokleni odar, kechiyong Libya nung alima kintemi agizüker aliba Tripoli sorkari linük anütoklen ya disaster zone ka ta sangdongba den parnoki teyari yoktsü ta metetdaktsüogo.

Benghazi administration-i ashiba agi, Mediterranean

tzüküm nung aliba Derna yimti nung nisung tasüming 1000 dak tema ngutetogo.

Hombarnü Daniel yipru agi Libya anütoklen kanga mejungi kongshia liasü aser iba ajanga Wadi Derna ayong nung tzünokdang ana pokdang aser tzü cubic metre million aika ayonglang leni yoka ayongküm ajunga metsüing aser Derna yimti dak kanga mejungi konshia liasü.

Tzü tone aika züyüm leni yima aoba mapang apartment block tem raksatsü aser apu ka apongtoka liasü.

Mongolbarnü Tripoli nungi Al Jazeera osangbener Malik Traina-i ashiba agi, tzümetsüing lendong nung nisung kwi sama iba indang osang tejangja memetet aser nisung 5000 nungi 10000 tsüingda samara alitsü ta asatetogo.

(Maneni tapak 8 nung...)

OFFICE OF THE CHUCHUYIMPANG EDUCATIONAL TRUST

Endorsed & Formed on the 56th Senso Mungdang by the Chuchuyimpang Senso Mungdang (Citizens Conference) Mokokchung :: Nagaland Estd : 2016

TENÜNGSANG AGÜTSÜR

- Chuchuyimpang Educational Trust-i Sensosanger jenjang balala nung takok angurtem nem tenüingsang tetushi tulu agütsür.
- Er. Moasanen Imsong** (S/o Mr. Limawati Imsong & Mrs. Temjenmongla Jamir) for securing the post of EAC through NPSC (NCS, NPS & Allied Services) Examination.
 - Mr. Imowapang Imsong** (S/o Mr. N Among Imsong & Mrs. S Chubala) for securing the post of LDA cum Computer Assistant through NSSB.
 - Dr. Kumzukienla** (D/o Mr. Aolemba Pongen & Mrs. Rongsentula Jamir) on being conferred with Doctorate of Ministry on the thesis topic "Mobilizing Mission Towards Children at Risk from Margins Perspective in Dimapur Churches" under Program for Theology and Culture in Asia (PTCA).
 - Dr. Imchasunep Jamir** (S/o Lt. I. Bendangnukshi Jamir & Mrs. R. Chubala) on being conferred with Ph.D on the topic of thesis "Sustainable Management of Solid Waste in Nagaland: A case study of Kohima, Dimapur and Mokokchung", Department of Geography, Nagaland University, Lumami.
 - Dr. Alemmoa R Jamir** (S/o Mr S.R Tamsu and Mrs I. Merenla) on being conferred with Doctor of Philosophy (Ph.D) in Horticulture on the topic " Evaluation of Genotypes and Response of Organic Nutrient Sources of Coriander (Coriandrum Sativum L.) from Bidhan Chandra Krishi Viswavidyalaya, West Bengal.
 - Ms. Rongsennungla Imsong** (D/o Mr. Aomeren & Mrs. Masalila) for securing the position of "Gold Medalist" in Bachelor of Arts (History) from Patkai Christian College (Autonomous), Chümoukedima.
- Tarutsü aliba anogotem aser wadang ajak nung teyanglur Tsüingremi nenok maneni azükärua len aniangma ta sarasademtsür.
- Sd/- (JUNGSHIS JAMIR) Convenor** **Sd/- (TOSHIKUM JAMIR) Secretary**

OFFICE OF THE CHANGTONGYA STUDENTS' UNION

TENÜNGSANG AGÜTSÜR



Sb. Takusangba
(22M0046)
Assistant Research officer
Rank-3



Kr. Nungshienla
(22M0514)
Junior Divisional Accountant
Rank-20

Changtongya kaketshir Telongjem ajanga Wb.Imnasukup aser Wt.Bendanginla na jabaso Sb.Takusangba, aser Late.C Olem Longkumer aser Wt. Anungla Jamir na jala Kr. Nungshienla, tenati NPSC CSE, 2022 agütsüba nung takok tulu ngutetba asoshi tenüingsang agütsür.

Tsüingremi nena taküm aser wadang ajak nung maneni moajangma.

Sd/-
Sb. Longjakrep
President, CKT

Sd/-
Sb.Tiarenba
General Secretary, CKT

Office of the **Khensa Village Council**

TENÜNGSANG AGÜTSÜR

Khensa Village Council aser Khensa Sensotsür Mungdang ajanga akhümtsübu aser tetushi tulu agüja Wt. Asangla lmti nem tenüingsang agütsür. Lai sorkar tenzükbä mapa nung Indian Administrative Service (IAS) mapa ngutetba atema pelaba lemsateper.

Yimden aser lokti tenzükbä nung asen Teyanglur Tsüingremi maneni asen lenir taküm ajungketa moajangma.



Sd/-
I.Alemmeren Longchar
Chairman
Khensa Village Council

Sd/-
Zülutoshi
Secretary
Khensa Village Council

Office of the **RIONGSANGER PUTU MENDEN**

Yimjenkimong Village : Dist - Mokokchung, Nagaland

TENÜNGSANG AGÜTSÜR

Imtisama Ozukum aser Tongpangtangla jabaso Eno **IMYANGLUBA OZUKUM**-i NPSC (NCS, NPS & Allied ServiceS Examination 2022) tetoktepeba nung tanabuba jenjang tongteta Sub-Treasury Officer ngutetba atema Yimjenkimong Rionsanger Putu Menden-i konang nüingsang agütsür.

Nai mapa meranga inyakba aser tenangzükbä yutetba ajanga iba jenjang tashi alangzükbä. Iba ama takok tulu ngutetba ya yimtsüing nüburttem ajak asoshi rajemshitsütsü aser tangazüktsü tuyur ta angateta kümrem pelar. Tarutsü anogotem nung aika ajangzükbä rongnung iba ya mezüing jenjang südakjang ta teyanglur Tsüingrem dang sarasademtsür.



Sd/-
Meyionen Ozukum
Secretary

Sd/-
C Imyu Walling
Chairman

OFFICE OF THE **DIMAPUR YIMJENKIMONGTSÜR TELONGJEM**

Dimapur - 797112 : Nagaland

TENÜNGSANG AGÜTSÜR

Dimapur Yimjenkimongtsür Telongjem (DYT) ajanga **Ms. Sangeryangla Lemtur**, daughter of Lt. Lolenliba aser Mrs. Ngangmesola promotion Principal DIET Tuensang nung anguba atema Tenüingsang agütsür.

Tsüingremi la taküm aser tenzükbä wadang maneni moajang ta DYT-i sarasademtsür.

Sd/-
Wt. I. Anungla, Pesident
DYT

Sd/-
Wt. L. Akala
General Secretary, DYT

Mokokchung nung Nagaland State Level Volleyball Referee Exam 2023 agidagi



Mokokchung nung Nagaland State Level Volleyball Refree Exam 2023 sentong agiba mapang tadener den MDVA lenirtem aser tatidang agitsü tongtipur külemi tangokba noksa.

Mokokchung, Rongjui/September 12 (TYO): Nagaland Volleyball Association aser Department of Youth Resources & Sports ketdangsüa Multi Sports Complex Mokokchung nung Nagaland State Level Volleyball Referee Exam 2023 agidagi aser anogo asemnü September 12 nungi 15 tashi agiba mapang Mokokchung District Volleyball Association- i iba tatidang achayanga anepalutsü. Nagaland nung Volleyball asayaba ajungketa aotsü asoshi talisa referee ketdangsüba nung awajema sütetsü asoshi

aser asayaba yimya nung temelenshi kadaktsütsü nükla nung iba tatidang ya agidagi. Dr. Harish Kumar Tiwari, Certified FIVB Level-1 Coach & Deputy Director of Sports Nagaland University aser ano Ramesh Babu Vidyarthi, National Referee, Volleyball Federation & All India Referee Examiner tenati anogo asemnü nungji tesayuba balala agutsüba den tatidang dena agitsü. Tanü iba tatidang agiba aser tesayuba sentong tenzüka mapang telongjem senden tatsüka agidang MDVA Tir Wb. Imtipokym-i ketdangser ana(2) aser iba tatidang nung

adener ajak dang tepelaba lemsatepba den parnok pela agizüka liasü. Naga nungertemi Naga nungerji aso ajen tatsü, aji asünung volleyball asaya asoshibo lenmang sadema mali ta bilemer, saka iba tangatebaji kanga dang tai, kechiaser shirnoki temulung agutsür parnok asoshibo kechisarena ajak nung takok lenmang sadema lir, ta shia iba tatidang nung adenertem ajungshia liasü. Iba tatidang nung ya Mokokchung, Wokha, Tuensang, Longleng aser Phek district-tem nungi Volleyball asaya meimer 37 tashi dena lir.

Pfutsero nung football camp ka ayongzüka agiogo

Dimapur, Rongjui/September 12 (TYO): Phek Deputy Commissioner aser Nagaland Sports Association na longjem September 11 aser 12 nü Pfutsero Sports Complex Ground nung anogo ana atema angati football camp ka den exhibition asayatem ayongzüka asayaogo. Camp lapokba sentong nung o jembiba mapang Nchumbemo NCS, ADC Pfutsero-i, iba sentong ayongzüka agitsü atema Pfutsero HQ shimba atema Chief Electoral Officer, Nagaland aser District Electoral Officer, Phek na dang pelaba lemsatepa liasü. Iba sentong nükjidong tongtibangtibaji Systematic Voters' Education and Electoral Participation (SVEEP) program ajanga lanurtem nem voting aser registration dak sendakba nung tangazükba agütsütsü asoshi lir, ta ADC-i ashi. Paisa, SVEEP ya Election Commission of India indang sentong ka lir, koba election magiba mapanga küm tepyong inyaksangshir ta ashi. Maneni Nchumbemo NCS-

i sentong nung shilem agirtem dang iba maongka ya süoki ia agitsü ajungshi, kechiyong iba sentong kübok Nagaland Sports Association nung züngoksema aliba coach temi angati coaching agütsür, ta ashi. Item coach tem yagi football tasa aser shisatsütem aser lanurtem libaliro azüoka alitsü asoshi tangazükba agütsür, ta pai ashi. State SVEEP Icon, Keneinguze Immanuel Pienyü, shiba football asayar ka lir, paia sentong nung o tatsü ka jembiba mapang lokti tarutsü yanglushiba nung lanurtemi koda tongtibang shilem agir iba indang lemsatep. Keneinguze-isa, vote agütsütsü temeden aliba amshitsü asoshi lanurtem khuret indang lemsatepaba den pei tenüng mezüngoksemi alirtem züngoksemsü ajungshi. Iba sentong ya Phachulo, AEO Phek lenisüba nung agi aser GHSS Phek nungi Campus Ambassador, Kum Naomi Vese-i ken tajung ka tena liasü. Iba sentong ya CMCC Pastor Rev. Dr. Kezhopoyi Tunyi-i sarasademer tembanga liasü.

Leo Club Inter School TT asayamung tembangogo



Dimapur, Rongjui/September 12 (TYO): Royal Oak-i teyari agütsüba 34buba Leo club Inter-school Table Tennis Tournament September 10 nü tembangogo. Kümshia asayaba iba asayamung ya Leo club, Dimapur-i ayongzüka asaya arudar. Asayamung nung tebur kija asaya ya Delhi Public School nungi Shreyans jain-i akok aser Little Star Higher Secondary School nungi Akumlong Longkumer tanabuba jenjang nung liasü. Tetsür kija asaya final nung Little Star Higher Secondary School nungi Elita A Sangtam-i Little star Higher secondary school nunigsa Tania Kachari koka liasü. Tebur tarep asaya nung

Little Star Higher Secondary school nungi Kihika Yeptho aser Akum Longkumer nati Delhi Public School nungi Samyak jain aser Kushal Sethi na koka liasü. Tetsür tarep asaya nung Little Star Higher Secondary school nungi Tania Kachari aser Elita A Sangtam nati kasa school nungi Gracia aser Atolika na koka liasü. Tebur kija asaya Delhi Public School-i akokba dak alaker, tetsü kija asaya, tebur tarep asaya aser tetsür tarep asaya ajak Little Star Higher Secondary School-i koka liasü. Asayamung lapokba sentong nung ROYAL OAK Proprietor, Naina Jain alakteta jaoker liasü.

Kasa mapang nung 28buba Leo club Inter-school slogan tetoktepa-a agia liasü, koba Naina Jain-i tendanga liasü. Slogan tetoktepa ya St Mary Montessori Higher Secondary School nungi Mashunring Shimray-i akok aser tanabuba aser tasembuba jenjang nung Delhi Public School nungi Nilona Sema aser SD Jain Higher Secondary School nungi Veda Singh na liasü. Leo Arihant kala tawabangba kübok Leo Sanyam Paharia aser Leo Ayush jain nati achayanga item project tem inyakogo aser asayamung shibangba sentong nung Deputy Commissioner of Police Vesufra Kezo NPS alakteta jaoker liasü.

Libya tzümetsüng lendong... (Tapak 7 nungi...)



"Ketdangsürtem Derna tonga aotsü atema tetsükdaktsü adoker, kechiyong yimti-i aoba lenmangtem raksaogo mesüra tzi agi metsüngogo," ta Traina-i ashiba den, Derna tema nung aliba nüburtem atemabo teyari tonga aru tenzükgogo, ta shisem. Yipru ajanga yimti den tesendaktep raksatok aser iba ajanga tzümetsüng lendong nung asüba aser kiojen balala raksaba indang osang tejangja magiteti lir. Mongolbarnü Al Jazeera den sensaksemba mapang National Council on Libya-US Relations Hani Shennib-i ashiba agi, "yimti teyong nung ali 4sq km shi ajunga aponger oatokogo." Mozükitem nung shiranga munger alirtem aser staff tem tzi agi mozükitem metsüngba ajanga toktsür aotsüsa aküm aser tzi agi metsünger aliba tesemtem nungbo nisung aika

sabanger lir," ta Traina-i ashi. Libya dang International Federation of Red Cross and Red Crescent Societies delegation züngsem Tamer Ramadan-i tzümetsüng agi teraksatsüba baner arutsüba achayangtsü asoshi tebilem akaba lemsatepogo. Pai ashiba agi, tzümetsüng agi teraksatsüba bener arutsüba ya sorkar kijai achayang mesütetsü aser alima kintem teyari nungdaktsü. Benghazi Minister of Civil Aviation Hichem Chkiouat-i Derna semdangogo aser pai Mongolbarnü Reuters news agency dang ashiba agi, "tzüym, lenden aser ki telung nung tasü mang ajaklen mepidaka lir." Minister-isa, "Ni tali-tapong jembir masü saka yimti shilem 25 bo maka kümogo," ta shisem.

BILEMDANGANG
"Timtem aser tetsükdaktsütem ya mepaitoktetba meimchir sobutsü."